

乾隆三十八年七月兩

淮鹽政李質穎送到

黃保卿倭患考原壹部

計音 壹 本

倭患考原上

閩越人黃侯卿纂輯



洪武二年倭寇山東淮安及沿海郡邑

三年倭寇山東轉掠浙東福建旁海諸郡尋又掠溫

州上遣萊州府同知趙秩賜璽書諭王良懷言倭

寇海上書至日如臣我奉表來庭不臣則修兵自

固秩至諭王中國聖主威德非蒙古比王具方物

遣僧隨秩奉表稱臣入貢

按元遣趙良弼誅倭夷好語寔覘其國也既而

發舟師數千襲之比至一時風霆漂覆無遺類
自是不與通者數十年至是秩至其國王猶疑
為良弼欲殺之秩曰聖天子生華帝華非蒙古
比云云乃得免

五年倭寇海鹽及澉浦與福建海上諸郡上諭劉基
曰東夷尚禪教姑遣明州天寧寺僧祖門南京瓦
官寺僧無逸往諭之王遣使同二僧入貢初令浙
江福建二省造海船防倭

六年以於顯為總兵官出海巡倭是年倭寇登萊

七年寇膠州尋遣僧來貢無表文却之令中書省移
文責王

九年倭王遣僧歸廷用等奉表貢馬及方物謝罪上
賜王及使文綺有差已而覽表文曰良懷不臣詔
責之

十二年來貢無表文安置使人于陝西番寺

十三年令禮部移書責王數掠我海上遣僧如瑤來
貢馬復却之諸僧皆安置陝西番寺

十四年倭王遣僧奉表入貢乞還安置諸僧使詞甚

恭順上曰日本既謝罪還其使召至京師宴賞遣歸

十五年倭僧歸廷用又來貢于是有林賢之變由故丞相胡惟庸通日本謀為不軌上怒貽訓絕之勒碑寧波海堧不與互市

十六年倭寇金鄉平陽

十七年倭僧如瑤又來貢坐通惟庸發雲南守禦是年信國公湯和致仕居鳳陽上召往築登萊浙江沿海五十九城民丁四調一為戍兵

二十年置浙東西防倭衛所復遣江夏侯周德興築福建海上一十六城設衛所燧堞調漳泉民丁為兵戍之

二十六年倭寇金鄉

二十七年詔遣都督僉事劉德商高巡視兩浙防倭三月勅都督楊文魏國公徐輝祖安陸侯吳傑練兵海上防倭

二十八年倭寇金州會靖難後遣太監鄭和等率舟師三萬下西洋日本遣人來貢并擒獻犯邊賊二

十餘人即付使人治之縛至甌中蒸死

永樂二年使還遣通政使趙居任賜王冠服文綺古
器圖書又給勘合百道令十年一貢每貢副使等
毋得過二百人若貢非期入船逾數夾帶刀鎗並
以寇論居任還不受王餽上喜厚賜之尋命都御
史俞士吉賜王印誥冊封為日本國王名其國之
鎮山曰壽安鎮國山上為文勒石久之嗣王道義
卒子源道義嗣益奸狡時令各島人掠我海上
六年寇登州沙門島一帶鈔畧殆盡始置脩倭都司

九年寇松門金鄉是年遣禮部員外呂淵諭王還所
掠海上人

十六年倭王遣使謝罪都督劉江時鎮守遼東繕海
上墩堡伏兵俟之

十七年倭船入王家山島傳烽沓至劉江率精兵疾
馳入海窩賊數千人直抵馬雄島進圍望海窩江
發伏出戰遣奇兵布伏諸山下斷其歸路賊奔入
櫻桃園江合兵圍而攻之斬首七百四十二捕生
八百五十七上召江至京封廣寧伯自是倭不敢

窺遼東

二十年倭寇象山永樂初西洋之役雖伸威海表而華人習知東夷金寶之饒夷人來貢亦知我海道奸闌出入華夷相糾以故寇盜復起非廣寧之捷禍未已也

宣德元年倭王遣人來貢人船刀鎗不奉我約束上諭使臣自後貢船毋過三舟使人毋過三百刀鎗毋過二十否則不受七年来貢如約束受之

八年王源道義卒上命太監雷春少卿潘賜等往弔祭

十年嗣王遣使貢謝倭自得我勘合方物式器滿載而來遇官兵矯稱入貢貢即不如期守臣幸無事輒請俯順夷情主客者為畫可條奏即復許貢云不為例嗣後再至亦復如是窺我無備肆出殺掠滿載而歸末年海防大備賊不得間貢稍如約遂許夷至京師宴賞市易飽恣其欲矣

正統四年備禦漸疎倭寇大嵩入柁渚官庾民房焚

劫一空驅掠少壯發掘塚墓束嬰孩竿頭沃以沸湯視其啼號拍手笑樂捕得孕婦忖度男女刻視中否為勝負飲酒荒淫穢惡不可名狀積骸如陵流血成川城野蕭條過者隕涕于是朝廷下詔備倭命重帥守要地增城堡謹斥堠修戰艦合兵分番屯駐海上寇盜稍息

五年倭突寇登州聞有備遁去

七年來貢

十一年倭寇海寧乍浦

成化初年倭忽至寧波知我有備矯稱入貢守臣為請于朝欲遣之至京楊文懿公守陳貽書張主客力言其不可許

正德六年宋素卿源永壽來貢求祀孔子儀注不許
鄞人宋澄告稱素卿本澄從子叛附夷人法當誅戮守臣以聞主客以素卿正使釋之令諭王效順毋侵邊海

八年僧桂梧等來貢

十年倭焚沙門島等處光射南岬居民露刃者十餘

日

嘉靖元年倭王源義植無道國人不服諸道爭貢僧
宗設僧瑞佐及素卿先後至寧波故事凡番貢至
者閱貨宴席皆以先後為序時瑞佐後至素卿奸
狡通市舶太監餽寶賄萬計令先閱瑞佐貨宴又
令坐宗設上宗設席間與瑞佐爭忿相仇殺太監
以素卿故陰助瑞佐授之兵器致殺脩倭指揮劉
錦等大掠寧波旁海鄉鎮素卿坐叛論死宗設瑞
佐皆釋還給事中夏言上言禍起于市舶禮部遂
請罷市舶而不知所當罷者市舶太監也然尋罷
尋設如東夷有馬市西夷有茶市江南海夷有市
舶所以通華夷之情遷有無之貨收徵稅之利減
戍守之費又以禁海賈抑奸商使利權在上也罷
市舶則利孔在下奸商外誘島夷內訐海上無寧
日矣

二十五年以朱紘為浙江巡撫都御史兼領福興漳
泉并福寧州地方紘清諒方勁任勞任怨嚴戢閩
浙官員通番渠魁于是衣冠盜切齒詆誣惑亂視

聽必欲殺紘旋改紘為巡視陰遣言官劾訊紘憤
悶卒所任將吏殺賊有功者皆論死繫獄是年海
道副使柯喬都司盧鏜獲通番賊于走馬溪斬之
船貨沒官叙功題請識者趨焉御史陳九德叅論
駁查差官勘問皆擬重典後恤刑郎中陸穩乃奏
釋之

三十一年浙巨寇王直勾倭為亂閩賊許朝堅洪迪
珍亦誘合倭奴往來海上遂殘黃巖掠定海豕突
劫掠閩浙騷動遣都御史王忬巡視兩浙兼領漳

泉福興四郡以都指揮俞大猷湯克寬為閩浙叅
將剿賊顧兵政久弛將士耗鈍水寨戰艦所在廢
壞忬經畧未幾羣盜總至柵寨列港分約諸島內
招亡命勢益猖獗

三十二年俞大猷冒險出洋焚蕩巢穴賊首逸去群
盜流散乘風奔突倏忽千里溫台寧紹杭嘉蘓松
揚淮并受其害克寬統領步兵往來海堧護城捕
賊斬獲亦多忬擒治奸豪破解支黨時論以為得
策而通番奸豪又言忬大猷搗巢非計且搖動忬

忬薦盧鏜起為閩叅將代克寬克寬以副總兵屯
金山閩人故忌鏜凶險不可用南京言官又復薦
鏜

三十三年倭犯江北海門如臯通州皆被殺掠是時
復用盧鏜為叅將而以俞大猷為浙直總兵未幾
工部侍郎趙文華以海賊猖獗請禱海神權相嚴
嵩遂遣文華行禱公私勞費不貲皆歸囊橐比忬
改大同巡撫徐州兵備李天寵代忬以南京兵部
尚書張經提督浙閩江南北七省軍務經有文武

才是時柘林倭寇盈二萬公奏調永順兵一萬保
靖兵一萬狼兵八千狼兵先到文華即欲搗其巢
經與諸將謀咸謂不可欲待永保二兵至合擊之
文華怒遂檄經通倭以聞數日賊出狼兵邀擊之
不利經曰邀擊且不利况搗其巢乎及嘉興保靖
兵至與戰亦不利經與大猷馳入蘓州督永順兵
至平望與賊戰大破之賊敗走回王江涇保靖兵
從嘉興追而北永順兵從平望追而南夾攻又大
破之斬首三千餘級經且以百功歸文華文華悔

遣人反其奏已入矣乃揭報朝以賊為浙兵投毒
死也經功竟為所掩遂與天寵皆詔獄論死西市
以浙西巡撫胡宗憲代天寵以南京戶部侍郎楊
宜代經

三十四年寇福清海口殺數百人大掠而去

三十五年春廣盜蕭憲寇掠嘉定焚戮雪慘又有陳
東者亦廣東人蟠據柘林周浦之間屢敗官兵三
月盜僧徐海徽州人復引倭數千與陳東合攻圍
乍浦進逼桐鄉時叅政阮鶚起拜巡撫駐兵桐城

被圍者經月京營左擊宗仁力戰死之官兵敗績
烽火相望朝議以通運漕固留都護陵寢為急僉
舉兵部侍郎沈良材督討趙文華以前祭海熟識
夷情也因而自具疏請行嚴嵩急欲就趙功而虞
其弗支以車駕司正郎郭仁佐之比文華至嘉興
阮已破圍驅賊宗憲方因歛奸人童華邵岳等得
徐海老母幼弟黃金白璧以感其心朱緋華轂以
贖其志用招徐海海與東合遂舍桐城而屯呂港
東屯新場衆且二萬餘結巢于乍浦城南之教場

及瀕海秦山之麓絡繹二十餘里胡與阮分布水陸大兵輻輳四集屯劄要害徐海欲設詐謀歸與通事蔡時宜等言願立功贖罪因誘賊首麻葉及倭酋入見軍門而約我兵縛之後又執陳東來獻而兼有其衆意圖易船回島以脫死耳時或中於其術郭仁獨以為不可文華遂以乍浦為徐海之衝使郭仁往守蓋投之死地耳然乍浦破于衆兵徐海挾二妓及精倭二千餘奔據沈庄胡遣中書羅龍文入賊巢易徐海來見至則跌坐階下環以

勁敵百餘各執利器莫敢誰何諸公議欲具䟽縱海還島宣布天子威德使諸夷効順阮獨排衆論一意任勦尋有旨宜速勦除言撫者斬于是胡阮分兵屯劄扼賊諸衝遂舉火夾焚其巢海死于烈焰中莫辨其面召海二妓一名綠珠一翠翹者識之方知元兇授首將吏舉酒交慶有逸寇一十八舟竄入寧波邛家洋據山為巢官兵攻之屢劄阮獨率遊擊尹秉衡追剿斬獲甚多餘賊渡溫奔閩時九月二十等日也冬寇福建之漳浦

按吾學編有胡總制計擒賊首王直之語而不
及焚徐海事余近叩朱都護先言直竟逸去盖
朱當日在胡公中涓者言不予妄郭光祿南征
寔畧亦云舟山劇賊若天不欲殲之每進剿必
遇風雨也然卷末又有方議休卒伺隙以圖萬
全之舉乃值趙連檄速還云：則縱虎遺患罪
有所歸耳榆林之戍亦天道哉朱都護又嘗言
胡阮二公初甚相驩也時以撫勦異議遂有微
隙云

三十六年以浙江都御史阮鶚提督軍務巡撫福建
地方閩有軍門自阮始是時承平已久民不知兵
海寇山賊一時并發軍儲武備樓船火器之屬束
手無資而衛所軍餘郡邑機兵巡司弓兵之徒大
都市鬼虛應阮至不避勞怨殫瘁厝施尤拳：加
意學校未幾出巡海上意在折衝詎倭數千由福
寧三沙薄省南臺洪塘之間焚掠猖熾阮以力士
陳成等數十人循海堧趣援會城行至吳航古嶺
人馬困乏成等方進炒煨杯水為食倭千餘遽集

阮馳入樂邑躬登樓櫓俾發矢石射敵連斃數首
賊方散去阮乘夜取間道入省調浙廣諸兵與賊
戰于吉原西峽諸處輒奏斬獲賊驚訝曰阮兵安
得猝至閩耶急遁去冬復合漳賊數千屯于海口
阮督分巡道盛唐提兵營于綿亭出廣浙諸兵圍
之賊乘夜潰去阮督兵追勦于灣門斷嶼之間賊
赴海死者無算御史吉澄累以捷聞輒賜金綺會
海寇許朝堅謝策等勾倭突至漳州登岸焚掠阮
訪知有賊船灣泊南灣逼近詔安梅嶺皆接濟通
番之徒在馬督同各道親臨其地計獲八灣四姓
巨魁何邦珙等二百餘名搜出各家違禁貨物會
問具題悉置于法士民翕然稱快九月延邵山賊
復起公躬督官兵征剿悉就禽斬于是閩省閭閻
始有更生之望矣

三十七年有旨逮阮巡撫士論惜之由何邦珙等奸
黨飛揭中傷胡總制修劾乘而陰擠云

按阮鎮閩日有獲賊疏及諭民約法二十四事
詞極懇切足以見其拊循勞苦血戰艱難也迄

今閩中父老類能誦之當其時竟抱不白之冤
而僅以身免樊蠅市虎亦可畏哉

夏四月倭合漳賊踪連江踰北嶺復逼會城遂陷
福清縣城訓導鄔中涵被執不屈而死殺掠之慘
不可言狀逾旬殘毀南安五月至泉御史樊獻科
率士民固守二十餘日賊攻永寧衛不得入流而
月港隨風飄至海口覆溺甚衆把總秦經國方坐
立功遇之擒斬數十級以贖失事之罪又海賊洪
迪珍謝策許朝堅等糾倭三千餘散劫諸村旋犯

詔安殺男婦百五十餘人

三十八年新舊倭奴結聚數千焚掠邊海兵力脆弱
往：陣亡二月焚劫詔安雲霄諸處三月焚劫長
泰善化里攻其城不得入仍寇泉州掠南安破某
巡檢司四月陷福安縣城殺擄男婦三千七百餘
人轉寇福州五月陷永福縣城知縣周煥死之八
月由長泰劫掠南靖諸村九月由龍溪突劫平和
清寧里十一月倭千餘屯福清之上逕時巡撫軍
門王詢委坐營都司朱先督率桑植土兵禦之進

戰楓亭斬倭二百餘級奪回所擄男婦二千餘人
時論以為創見之功王巡撫條奏安攘七事未幾
以畏讒引疾去代者劉巡撫燾

三十九年倭掠福州省城外諸村城門晝閉者彌月
劉巡撫下令大開之不禁往來者親督將領及家
畜健兒邀擊于閩安鎮斬獲千餘級劉精騎射家
健數十輩俱習戰各倭聞風遁去四月陷崇武據
之四十餘日突寇平和泉州諸處皆以有備去又
有倭五百餘徒自仙遊直抵永春破其邑及陷寧

德十月倭破福清金峰寨貢士陳道有 文甚哀

四十年春倭自漳州出掠同安及晉江與頭諸村又
焚掠詔安東關外者三閱月住長泰者三十餘日
旋復掠晉江南安諸村秋合土賊掠人於安溪轉
寇泉州是時郡邑皆有備且多良守令雉堞無恙
廣兵王鳳等作亂自江西渡關欲窺福州至茶洋
聞省城有備不敢下劉單騎往諭還所擄男女七
百餘人劉巡撫奏定兵糧以圖久安長治䟽居亡
何以糧乏兵疲才猷莫展自陳不職去代者游巡

撫震德

四十一年是年倭寇閩者有四夥一泊寧德之雲淡門一屯興化之江口諸村一流突同安南安諸村分黨圍福清一自漳州突屯詔安二月倭襲陷永寧衛城者再殺傷軍民焚掘房墓劫屍勒贖脅後數萬于是漳泉之間禍尤慘矣四月倭進逼興化郡城是時游巡撫敗賊于江口汪兵備道昆敗賊于囊山漳泉土寇稍聽招撫殘黨流倭屯于福清興化寧德塞路四至軍門告急于浙江總督胡宗

憲八月遣叅將戚繼光督兵援閩戚有制之師首殲倭于橫嶼再捷于牛田連破六十餘營于興化之涵頭先後斬級三千餘顆是時寇汀延諸賊各守巡道勦撫之其寇連江之倭合福寧新倭連陷寧德壽寧政和三邑獨松溪縣城不一得知縣王賓力禦之戚寧奉文回浙是時胡總制亦躬至建寧聞牛田之捷而返十月潮賊吳平糾倭陷福建之玄鍾所城十一月新倭圍興化府城者逾旬游巡撫將遣步卒往援皆以天兵為名號先差二健

齋符驗期會談道翁時器倭于途殺二健令土人
詐稱奉差進城期于某夜舉火為號則天兵至矣
且戒不用巡警是時士民城守久困得其符驗以
為寔然至期乃倭從城之東隅舉火而入于是城
陷倭駐其中者兩閱月金帛子女燬掠一空

按野史有莆變二紀蓋自元至正間迨嘉靖壬
戌莆城凡再陷郡人宋曰仁最稱其詳今按莆
志于陷城事文多隱飾亦勝質之史哉

四十二年春倭陷岐頭鎮城而據之又陷平海衛城

屯住其中指揮歐陽深戰于東蕭死之軍門累疏
乞以戚繼光充福建副總兵部覆從之百姓始有
更生之望游䟽陳兵務三事

按倭之內犯皆土賊為之嚮導如永寧衛之陷
則泉賊李忬觀江益瘋等誘之也永春之攻則
謝愛夫黃元爵等誘之也浦城之寇則饒賊張
璉蕭晚林朝曦等誘之也其為患最大者則王
直徐海誘倭以犯浙吳平魯一本林鳳之徒誘
倭以犯閩廣所在皆然莆可知矣亦何怪于以

有天兵而敗哉

四月軍門譚綸至有新倭欲赴歧頭平海之黨總兵劉顯俞大猷邀擊之斬首二百餘級適總兵戚繼光亦至二十日譚直抵平海懸二萬金以賞衝鋒之士乃分戚與劉俞兵為三哨敵血矢心僇力並侵晨有黃雲東起白霧瀾山兵已合圍賊尚未覺逼巢縱火鏖戰烈焚死竄無算捷聞告廟陞賞有差其他各處殘倭槩有斬獲是時計功戚兵斬級一千二百二十顆救回被擄男女二千一十二

名口劉兵斬級四百九十四顆救回被擄男婦一百八十名口俞兵斬級四百九十六顆救回被擄男婦一百八十八名口一時副將材官如胡守仁楊文通王如龍蔣百清傅應嘉朱珏張元勳趙國柱朱璣張勳金科歐陽樞馬應龍陳其可顧喬李超王道詔安縣知縣梁士楚及蹶張之士有朱文達姜虎王濟胡世等首膺衝鋒破敵之賞樹功尤奇云十二月倭攻仙遊縣城未下軍門以王如龍胡守仁分兵斬獲一千餘級其機宜號令一聽于

戚繼兵尋擊長樂賊二百餘級

四十三年正月倭攻泉州安平鎮城三日不克聞戚
兵且至奔往同安二月戚繼兵督王如龍陳濠耿
宗元及總哨朱文達姜虎等追剿于王倉坪又敗
之于蔡陂嶺先後斬級五百餘顆其遁伏岩谷者
類被鄉兵芟薙殆盡五月潮賊吳平假以招撫為
名突據詔安縣梅嶺堡劫掠諸村是月譚以補制
去巡撫汪道昆代之是時屢捷之後兵威甚振春
汛路寨各有斬獲

四十四年有新倭于泉州永寧衛沙堤登岫劫掠指
揮白希周王世寔把總馮煥等擒斬一百名級又
倭于烽火門福寧海岸流突李起胡守仁等攻之
斬級三百餘顆把總姜虎于鹿灣梅水漁洋南山
柳溪地方斬獲一百餘顆六月潮賊吳平率倭數
千圍攻詔安知縣梁士楚禦退之吳平者先係總
兵俞大猷撫回梅嶺向在南灣殺賊報効因四十
三年二月聞閩廣二省有會勦之議遂遁于海傳
應嘉等擒斬二百四十八名顆吳平走廣海桐山

把總鄧銓追之傳應嘉與叅將湯克寬舉兵夾勦
又斬級一百四十五顆吳平復于廣海糾聚賊徒
大小船二百餘隻北犯玄鍾圍執把總朱璣兵船
盤據南灣譚軍門會戚總兵馳赴漳州督傅應嘉
統魏宗瀚等追勦吳平駕遁出海七月復來十月
戚總兵親督陸兵渡海率寨路水陸夾攻先後斬
級二千餘顆生擒叛賊陳進卿等及俘獲無算譚
與御史李邦珍會題善後十二事

四十五年春倭船百餘突至泉州永寧各灣時戚兵

正巡沿海遂截殺之而潮賊吳平餘黨林道乾曾
一本之徒復寇閩中矣時晉江撫賊謝愛夫至家
益肆有勾倭再動之念知府萬慶計擒而殺之

隆慶元年春有倭三船自東南外洋駕入閩海王如
龍追剿斬級三十八顆又一夥于南日海壇乘間
登突把總朱璣追剿斬級七十九顆

二年秋海賊曾一本由廣入閩擁眾流突是年五六
月間駕船自高雷至廣城外公然劫擄肆志橫行
至建醮于海珠寺者幾晝夜以發貢佛狼巨銃發

射廣城聲不輟如雷重城堅閉官兵莫何搶造戰
艦聲震隣封至是駕船二百餘隻黨衆數萬侵立
鍾閩軍門塗澤民會總兵李錫督調水陸官兵來
擊于柘林雲蓋南灣等處三戰皆捷斬級七百五
十九顆焚溺不計把總朱璣趙記王世寔死于陣
曾賊僅存三十餘船遁去奏聞陞賞有功將領朱
璣等贈恤立祠是時廷議令閩廣二省會兵夾勦
曾賊以兵部侍郎劉燾陞右都御史總督兩廣福
建軍務以監察御史紀功兵部主事王倖協議機

宜興總兵李錫俞大猷計畫舉行十一月把總姜
虎于潮州黃岡城斬賊四十餘級

三年春倭船分夥于浯嶼銅山烽火諸處叅將張元
勳都司王如龍呼良朋楊文通陳琳顧喬歐陽樞
張竒峰等攻捕斬級三百一十七顆獲船七隻四
月曾賊突入詔安東林地方把總楊文通擒斬三
十四級姜虎于南灣雲蓋寺截殺計斬級一百八
十三顆生擒二十名義勇沈英奮管督漁船擒斬
生倭昭三郎等六月初四等日官兵進剿曾賊焚

溺船賊大半福兵斬級五百三十八顆姜虎調往
柘林攻賊斬獲二百餘顆廣兵斬獲名顆廣東
總兵郭威督叅將王詔等會合閩兵乘風徑進斬
級五百顆生擒曾一本解至潮陽梅溪身死餘黨
悉平

是時兩省用兵閩累獨甚轉輸供應耗費不貲
且一時製造巨船一百二十隻又為廣東造福
船八十隻窮山巨木斬伐無遺大姓墓材合圍
以上亦盡濯騷動襍沓甚于倭後之時云

四年春汛小埕水寨把總葉天選等于信地海洋先
後擒斬真倭一百一十四名顆七月廣東海賊歐
老擁衆突窺銅山古雷地方殺掠兇橫把總楊文
通督兵攻剿擒斬三十餘級賊遁回廣軍門塗澤
民題奏經畧地方十事

五年春廣寇楊老擁船至立鍾海洋覘知水陸有備
至秋遁去把總王濟五月于龍岩寺斬倭百餘級
六年春汛秦經國追剿南賊及衝沉倭船于烏坵海
洋截剿倭船于料羅灣把總沈英奮又攻獲倭船

于詔安之徐渡社叙錄具題各賞賚時漳州府同知羅拱辰議呈開番舶之禁通商販之利以窒亂源以裨軍餉軍門殷從儉行之有奏定歲額軍餉䟽沿海小民各遂活計云

萬曆元年潮賊林道乾乘春汛駕船奔突漳泉海洋竄據澎湖徑投東番蓋前因兩省軍門之招撫而不敢為非後因與劇賊朱良寶相圖不克心懷疑懼故也其黨林鳳最黠代領其衆四出流突六月至萬安奪百戶侯煇所領兵船五隻至烽火寨信

地破鑑江塘頭二堡至松山後港把總劉國賓哨官鮑尚忠等戰死

二年五月兩廣軍門舉兵討平叛賊朱良寶因會閩省軍門夾勦林鳳

三年夏五月海壇遊兵把總邵岳南日把總方策擒斬真倭于牛山東洋計六十餘名顆

四年林鳳遁誅駕大夥賊船百餘隻在東海乘風突至澎湖地方惠潮道遣官馮伯才等往招槩被殺害聞兩省兵至新港林鳳以輕舟四十餘號直走

西洋呂宋福建巡撫劉克誨與興泉道叅議遣浯
嶼道哨官王望高等于二月計往呂宋諭其國王
以番兵戰船攻鳳于玳瑁港獲賊總黃德許元二
首級奪回婦女三十八口及鳳賊謀主林逢春同
回呂宋國王遣僧入貢方物軍門具題遣王望高
等再同番僧人等往擒林鳳鳳于九月駕適廣潮
軍門督行興泉二道會總兵胡守仁嚴督叅將呼
良朋把總秦經國等以十月自浯嶼開駕與廣潮
叅將吳京兵船合艚追勦擒斬攻犁賊船過半若
計日可殄滅者適廣東惠潮道致書胡總兵令兵
且緩進聽本道招撫于是兩省議論不協而林鳳
之生死竟不可曉矣殷有酌議兵食疏

是時鳳賊有偽總馬志善等奔入潮陽告降乞
招故惠潮道有緩兵之議或者謂其納賄縱寇
云

恤援朝鮮倭患考附

友人陳生英偕李甥大年既梓余所纂集倭考
矣究于朝鮮事如耳食也客有示以許遊戎東
征諸刻及叙功疏讀之然後得其梗槩用約畧
為全書俾附錄焉

萬曆十九年倭寇朝鮮其首閔白平秀吉春夏之交
閩人番商許豫陳申朱均旺等報警時當事者疑
其為倭間幽陳申于獄尋出之

按倭呼閔白如漢大將軍之稱平秀吉貌若獮

猴短小多智初為人廝養卒以狡譎事山城君
得幸官至閔白未幾弒山城君自立為王襲取
三十六州多用利誘卑驕狙詐之術

二十年四月倭分夥大寇朝鮮兩月之間席卷七道
國王避于義州上疏乞援廷議以侍郎宗應昌經
畧事務總兵李如松提督南北兵共四萬餘名往
李係寧遠伯成梁長子為人勇敢機敏方平寧夏
時承恩之亂遂移師董東事時設三副將為三協
而諸偏裨近二十員云

二十一年正月初八日李如松親率南北兵克復平
壤副將楊元先登小西門軍聲大振倭奴胆落遂
連克開城進次碧蹄館李如松以數勝之餘鼓兵
長驅誤入倭伏得弟如梅如栢等突圍救出是役
也先勝後敗兵氣漸餒遂遣沈惟敬行購初欲愚
倭後為倭所愚惜哉

二十二年召宗應昌李如松還京撤散東征各兵而
遣臨淮侯李言恭胤子宗城為正使副將楊芳亨
佐之沈惟敬晉官遊擊兼其役賫勅印往封之奠

其撤倭還國不擾朝鮮也宗城至行長釜山營察倭無受封意且倨傲遂夜遁廷議囚之改楊方亨為正使沈惟敬副之

是年福建軍門許孚遠總兵朱先防海甚嚴倭不為患第歲侵民頗艱食無賴之徒櫻粟大都數縣皆然軍門擒其首鄧三輩斬于市問閩始安許有禦倭須知刻于倭奴入寇情形大畧具矣

二十三年冊使渡對馬島抵山城國親見閔白閔白勞賚甚厚勅印亦接受但其志不在封封之不足愜其望遂禮辭方亨等歸以大眾尾之渡海分屯釜山晉州各要害

二十四年朝鮮告救月凡數至遂以侍郎邢玠晉秩兵部尚書經畧其事晉僉都御史楊鎬經理朝鮮御史陳劾監察之設三司道二贊畫四總兵調南北軍兵共十萬餘名偏裨近三十員蓋重其事是年不尚書石星于獄死馬論斬沈惟敬東市以其悞國也

福建軍門金學曾檄諸司葺城池精器械修艚艍
復烽堠增營伍拔蹶張密探偵一時將領畢力効
命海洋無警金有八閩撫政漁船事宜及閩海兵
防諸刺尤皆禦倭長策

二十五年朝議徵兵四方羽檄旁午兵部題調福建
水兵二千朝鮮督撫特疏生名取都司許國威領
之行國威夙負忠勇雅富韜畧先為遊擊備倭遼
左習知地利夷情時以忤封使落官至是得檄慷
慨揚綏但自閩之朝鮮程一萬三千里兵士行役

者有如棄市臨發父子兄弟相送哭聲慘動天地
國威以鄉語慰諭衆藉無恐且御兵有紀所過安
堵秋毫無犯甫至王京即從攻島山受贊畫丁應
恭誣害雖才猷磊落不竟所施蓋應恭雖楊鎬而
國威鎬之故人也故波禍及焉鎬精騎射勇畧冠
世是冬親督六師攻圍清政島山寨破其外柵因
之凡九日清正請降未之許適倭救至我師退舍
丁贊畫遂乘機修怨鎬罷官歸里先是八月倭合
夥攻克南原副將楊元喪師三千六百人馬如之

廷論棄市衆論寬之謂其平壤先登之功未酬也
倭進至稷山國王將遁黃州海上楊鎬遣將解生
揚登山等戰退之追至慶州斬級有差

是時卽報有奏議云軀命難同瓜菓敝袴必待
有功故爵賞一端明主斤：愛惜今有事武夫
暴骨于原野儒者袖手于廟堂無事則遊魂沙
漠者未沾片語之溫而因人成事者濫沐踰涯
之寵欲以勸天下之勞臣斯已難矣此許給事
弘綱疏也又云前有勁敵後有更議設身而處

當事之地回顧盡是危機故東事不壞則已壞
則由事中人兩疏由前則撫臣分別功次太蚤
使僥倖者妬功避罪轉相鼓煽而閫帥已被操
戈由後則贊畫粧點敗衄失真使耳食者疑功
為罪疑罪為功而是非如辨穴鼠此陳御史劾
疏也余每讀此一增感慨又喜公論直道之在
人心因摘錄于此以資捫虱者之高譚

是年七月福建銅山把總張萬紀擒斬通倭劇賊
無齒老等六十餘名于井仔灣

二十六年閩金軍門遣人偵倭虛寔得報閔白已死
首具奏聞時我師分中東西水四路並進東路以
總兵麻貴率之攻島山清正營中路以總兵董一
元率之攻泗州石蔓子營西路以總兵劉鋹率之
攻順天行長營水路以總兵陳璘領之塞其歸路
刑馬為盟誓師決戰會倭果以閔白死撤備奔喪
勢窮力竭諸寨俱遁各路追擊于海咸有斬獲遂
班師叙賞云

按叙功疏內開載自丁酉九月以後洎戊戌九
月以還除損失官軍兵馬器械各有奏記外計
中路前後擒斬活倭二百五名顆東路擒斬倭
級一百五名顆西路通共擒斬倭級四百七十
八名顆水路通共擒斬倭級一千二百三十四
名顆焚溺生倭及船隻器械尤多

閩越人曰余生于越長于閩用竊有感焉夫閩與
越皆隣倭之國也倭之為患無時無之嘉靖之季
猖獗甚矣壬辰之舉不我而東者倭豈陰厚吾閩
與哉越蓋其精神在朝鮮未遑他及也及其罷衆歸

島又值主幼國疑首相雄長自圖不暇耳藉令彼
國內寧則虎豹終日不噬寧不噬草木以肆其毒
乎必以隣為壑也乃今濱海之民不倭之是慮而
恒冀倭之至者又豈治安景象哉抑聞之兵法曰
無恃其不來恃吾之有待余嘗與通侯貳師遊海
上窺其為倭備者舟可用乎器可用乎兵可用乎
三者而皆無之大都狃于故習了延歲月而已善
夫許遊我之言曰隋唐之主席其富强嘗以數十
萬之師加于朝鮮矣然竟無成功關白以奴隸之
子率髡首跳跟之夫一渡釜山直搗王京空其畿
郡勢如破竹者何哉尚文墨而卑武畧習承平而
忘戒備故也然則為閩越桑土衣衽之思者盍亦
以朝鮮為前車可乎噫嘻吁余真杞人也憂天良
可哂哉

附倭俗考

日本古倭奴國其國主世以王為姓漢時來朝歷
東漢魏晉宋隋皆入貢唐咸亨初更國號曰日本
其地數千里西南至海東北隔大山有五畿七道

以州統郡附庸之國百餘

其俗男子黥面文身不衣裙襦橫幅結束相連不

施縫綴女人衣如單被穿其中以貫頭皆披髮跣

足其王至隋時始制冠以錦綵金玉為飾

其人不竊盜少爭訟飲食以手而用籩豆用蹲踞

為恭敬死者親戚就屍歌舞為樂既葬舉家入水

浴潔以祓不祥

其兵器有矛角木弓竹矢以骨為鏃灼骨以卜吉

去信巫覡好奕博握槊樗蒲之戲頗崇儒書有好

學能詩文者尤信佛法有五經書有佛經白居易

集皆得自中國右見寰宇記今按其器如鳥嘴鏡

其山鎮曰壽安鎮國永樂初御製文賜刻碑

其產金 琥珀 水晶 硫黃 水銀 銅鐵

白珠 青玉 羅木 杉木 水牛 驢羊 黑

雉 細絹 花布 石硯 螺鈿 細扇

其貢馬 盃鎧 劍刀 塗金裝彩屏風 洒金

厨子 洒金文臺等物右見大明一統志

東夷去古未遠人毅而直刑簡而峻俗貧而寡竊

男子蹲而溺女子立而溺幼則披髮長則禿之婦
推其髻于後富貴家食稻衣錦貧而下者衣楮茹
粃糠而已其敢于內犯者猶吾濱海亡命時亦劫
奪倭夷間耳又云其國即扶桑出日處故名日本
有扶桑禪林第一寺右鄭良珍說良珍聞之積善
里人嘉靖末與其弟良珪皆

被倭掠去踰二十年所附中山王
封貢而歸嘗面質其所言不妄也

其地似魚形長二千餘里濶古百餘里田少山多
民居沿海空地捕魚為生以土山削峻為城郭首
長居于山上房屋無磚瓦皆草板遮蓋其王畿內

商買富盛餘國荒寂善殺戮無論老幼貴賤俱佩
長短二刀男子留後髮毛髮不着裙禪鞋婦人挽
髮跣足草染黑齒身服五色花衣亦多粉飾為容
喜溪僻云

其音語與中山瑠球相通

其上下文移往來書札只四十七字音韻相類者
通用



